

**Gagal seludup dadah RM4.89j**

Oleh Sazarina Shahrin

2012/03/28

SEPANG: Dalam tempoh 48 jam, Kastam Diraja Malaysia (KDRM) berjaya menumpaskan empat cubaan menyeludup masuk dadah ke negara ini seberat 19.57 kilogram bernilai RM4.89 juta.

Berikutan itu, empat lelaki warga asing berusia antara 22 tahun hingga 51 tahun kini ditahan reman 14 hari mengikut Seksyen 39B Akta Dadah Berbahaya 1952.

Timbalan Pengarah KDRM Lapangan Terbang Antarabangsa Kuala Lumpur (KLIA), Siti Baya Berahan, berkata kes pertama membabitkan seorang lelaki warga India berusia 35 tahun yang pertama kali ke negara ini tiba di Terminal Penerbangan Tambang Murah (LCCT), menaiki pesawat dari Kolkata, India, kira-kira jam 12.30 tengah malam, Ahad lalu.

"Hasil pemeriksaan rapi, Bahagian Penguatkuasaan KLIA menemui satu bungkusan warna putih disyaki syabu disorok di bawah beg seberat 5.04 kilogram bernilai RM1.26 juta," katanya di sini, semalam.

Siti Baya berkata, suspek kedua berusia 42 tahun ditahan menaiki pesawat sama apabila dikesan membawa dadah diletakkan dalam kotak mengandungi ketuhar gelombang mikro.

Katanya, pemeriksaan menemui satu lapisan khas di bawah kotak itu yang diisi serbuk putih disyaki syabu seberat 10.05 kilogram bernilai RM2.51 juta.

Kes ketiga pula membabitkan seorang warga India berusia 51 tahun yang menaiki pesawat dari Bangalore, India dan ditahan sebaik tiba jam 2 pagi di LCCT kelmarin, selepas menemui satu bungkusan putih disyaki syabu disembunyikan di bawah beg suspek seberat 3.98 kilogram bernilai RM995,000.

"Kes keempat pula pada hari sama jam 4.50 petang babit rakyat Nigeria berusia 22 tahun menaiki pesawat dari Cairo-Bangkok-KLIA dan imbasan bagasi lelaki itu menampakkan imej meragukan," katanya.